

INTERVENSAUN BANCADA FRETILIN KONABA OGE'13 IHA DEBATE GENERALIDADE IHA PLENARIA

Husi Bancada Fretilin, Deputadu Joaquim dos Santos Boraluli

6 Fevereiro 2013

Ex.mo Sr. P.PN.

Ex.mo Sr. PM

Exelencias,

Molok ba aprova OGE'13 iha generalidade, Fretilin hakarak hatoo kritika ruma ba orsamento ida nee, atu ita bele hadiak buat ruma nebe lalos iha prospata OGE nee. Ita hadiak sasan hirak nebe lalos atu governu bele exekuta ho diak hodi hadiak estadu nia moris, hanesan PM lia-tun katak ita rekunyese sala atu hadiak eh halo los fali atu povo bele iha asesu ba moris diak.

Iha execusaun OGE'12, ita resista kauza balu nebe provoca insusesu iha gasta osan, laos deit politiku sira mak hatene konaba nee, maibe cidadaun simples mos hatene. Tanba nee, FRETILIN preokupa tebes atu hadiak, maibe governu nebe iha ukun mak responde no foti ona medidas politikas, maibe resultadu mak latuir ho nesecidade eh aspirasaun povo maioria nian.

Sasan sira nebe lalos iha exekusaun OGE tinan kotuk, mai hosi hahalok balu, hanesan:

1. Sistema iha orsamento lalos bele hamosu gestao ba osan ladiak, tanba iha inconsistencia iha fahe osan no laiha efeciencia no efikacia iha gasta osan, hodi provoca insusesu iha governasaun;
2. Halo orsamentu atu hametin estado, laos hametin poder individu eh poder atu komanda; se laos atu hametin poder estado, bele hamosu desobediencia ba regras nebe bele garante exekusaun diak iha orsamentu, hanesan desobediencia ba siklus konaba halo gestaun ba finansas publikas, desobediencia ba regras atu halo orsamentu, indisciplina iha politik fiskal, no lasukat osan tuir kapasidade atu ukun;
3. Investe iha kapacitasaun rekursu humanu atu hametin estrutura estado nian, no investe iha setor produtivo mak bele garante exekusaun osan ho diak atu povo sente duni beneficio; neduni presiza iha garantia ba estrutura estado nian iha base atu bele halao buat ruma, liu-liu halo balansu ba prioridades tuir nesecidade no realidade estado nian;

Hahalok hirak nee mak lori impaktu at ba ita nia sociedade, maski ita gasta ona osan barak maibe resultadu nebe ita hein, lasatisfas povo maioria nia moris no hakarak. Ita bele aponta iha nee, impaktu at balu nebe mai hosi despesas estado nian durante nee:

- a) Ita nia Receitas domestik laos minarai, menus liu fali rendimentu sustentavl. Reseitas nee atu lori selu deit funcionario publika mos latoo, tanba laiha medidas konkretas konaba atu investe iha setor produtivo nudar alternative ba hamenus importasaun. Maski nune, ita nia despesas sae ba nafatin maibe reseitas tun ba bebeik. Nune, estado nia despesas depende los deit ba reseitas hosi minarai.
- b) Ita nia dividas/tusan boot liu fali rendimentu sustentavel. Situasaun nee bele lori ita ba denpencia ekonomiku, se ita lagere ho didiak estado nia despesas no harii kondisaun diak ba investimentu interno iha setor produtivo.

- c) Inseguru iha seguransa alimentar, halo mal nutrisaun kronika sae ba nafatin. Tanba osan nebe gasta labele justifika plano. Nee, indisius ladiak ba povo nia moris iha futuro.
- d) Autosuficiencia iha povo nia moris menus liu, tanba despesas estadu nian laobedese ona regras konaba halo balansu ba prioridades. Neduni mak dependencia ekomomiku iha sociedade timoroan sai boot tan deit, no desemprego mos nia numeru as ba bebeik.
- e) Inflasaun sae nafatin deit , halo cidadaun nia poder de kompras tun ba nafatin. Governu dehan katak kresimentu ekonomiku sae, maibe lareflete iha povo maioria nia moris, no laiha transformasaun ruma iha sociedade;

Realidade politik no ekonomiku hanesan nee, bele sai referencia ba ita atu hanoin didiak molok ba aprova OGE 2013. Tanba nee, FRETILIN hakarak hatoo hanoin ruma atu Parlamento Nasional konsidera molok ba diskusaun no aprovasaun iha especialidade. Ita presiza halo mudansa ruma iha Orsamentu nee, tuir objectivo no prinsipiu halo orsamentu. Se objectivo halo orsamentu ida nee mak hakarak hatun inflasaun no kombate kiak, entaun ita presiza hadiak alokasaun balu iha OGE'13. Se lahadiak, sei iha impaktu negativo iha exekusaun hodi hadiak ekonomia no povo nia moris.

Tanba nee, FRETILIN husu ba PN atu hadiak hanoin no hahalok hirak nee:

- a) Atu kombate kiak, ita presiza hadiak estrutura OGE'13. Nune ita labele monu fali ba erros passados. Sector nebe ladun importante bele hamenus tiha osan hodi tau fali ba sector nebe sai prioridade, hanesan kapasitasaun iha rekursu humanu, investe iha sector produtivo. Nune, ita bele iha garantia no efeciencia iha gastus publikus, hodi hetan kresimentu ekonomik nebe saudavel, atu ema hotu-hotu bele iha asesu ba moris diak. Se hatun tiha 30% hosi OGE, bele fo beneficia boot ba povo. Nune, dependencias ekonomika bele hamenus dadaun.
- b) Halo equilibrio iha distribusaun osan ba ministerio sira tuir prioridade estadu nian. Iha sector nebe laorienta ba objetivo orsamento, diak liu muda ba sector nebe bele garante susesu ba governasaun.
- c) Ho Politik fiskal nebe diak, atu hamenus kustu no hetan retornu diak ba investimentu estadu nian.
- d) Halo Revizaun ba politik de despesas ou gastus publikus atu bele garante investimentu iha sector produtivo; ita presza define prioridades foun no haforsa instituisaun nebe responsavel ba exekuta osan estadu nian. Nune bele orienta ita fo incentive ba harii industria kiik, empresas kiik, hodi kapacia sira iha area industrias no agrikulas, nebe bele fo asesu ba povo maioria hadiak nia moris.

Atu taka, hau empresta PM Xanana lian katak: ita rekunyese sala atu hadiak eh halo los fali, atu povo bele iha asesu ba moris diak, tanba ita mak responsavel ba desenvolvimentu no ita hamutuk mak bele hadiak nasaun nee. Obrigado ba atensaun.....